



Assaggi di Bisalta
portale linguistico e culturale dei territori della Bisalta

grafia Escolo dòou Po

Ël sèrpant

Ësloung al fianc èt la mountanha 's veg èt grose ëslindrie èt roque e èt gèroun portèe da l'erosioun: a soun èl vie dël serpant! 'S counta que propi là ënsima tra i rocàs que a tenou drit pèr miracoul ën broua ai gorjùn, a i sie ën sèrpant afròus que mincatant ou cala vèrs la piana e ou 's buta èt travèrs a la Cola e ou l'a fa soèrte fora. A l'é ën sèrpant que ou pia fourme e couloû divèrs a secounda èt qui qu'ou counta l'èstoria: ou l'a doue teste e i œi èt fœ, ou l'a mac na grosa testa coun na crèsta rousa, ou l'a la coua doubia, ou l'a d'ëscaie que coura èl soul ou cala a 's tènzu èt rous, ou soufia talamant fort que souènh ou fa calâ d'ëslavine e èt valangue... e counta ti qui count co mi! N' èstoria a ëspiega couma a sie nâ la valada proufouda ounda a i ëscour la Cola. – "Ën cavalié qu'ou virava i pais e que ou venìa da la Fransa ou l'era èstèt chamà da i abitènt èt la valada pèrquè ou i libereise dal dragou feroche que ou lasava nhant que i èstroup di bèrou a s'auzineisou ai prèe pi boun. El cavalié (quicun ou lou chama "*Jean la croix*") ou l'a afrountà la bestia e après èt na lounga bataia ou l'é riusù a pasaie èl cœr coun so fèr. Ël dragou ou l'é drocà ësloung al rivai rablandse ënsema pere e arbou finde a dësblase coun n'eschop propi ën found al Fràndie. Da la fria i soèrtia un broe vert que ou l'a tacà a ënfiliase ënt la valada coun mila chiti saout e lame pàzie. La Cola a l'era nâ.

Ël vive da soul dël mountanhin, que tut i dì ou bataia coun na natura avara e èt mal doumèstiâ pèr ëschancaie ën trubuland a la tèra mèra na cœia ëncôû pi mèra ëncôû, èl valangue e l'aluvioun que a 's n'aruvou souènh a vastâ tut, i unvèrn que a finisou pi coun ën baroun èt fioca a fan coure l'imaginasioun que a s'ënventa d'èstorie countèe ai chichou e ai grèndi pèr ëspiegâ lo que 's capis nhant ën na manera da fa èstâ tuti a bouca droevèrta.